

# Jan e lel krekrɛ eke awɲ

## Ów ek'it eke wɛl k'uw any

Agɲ dad eke Jan ek'el Jesu ec'erm es a, in im in ir Efes eb em. Pɔl anake sigm Sinyamel ek'anɲ yogɲ ab es a. Gbɛkɔ eke ow ibn a, Jan im ir yogɲ etɲ el Sinyamel a ec'idr es. Ow sosiem anake n'am esɲ kretienel ek'anɲ Sinyamel ab em a, em eci "ey".

Jan anake nɔn silel nyahan na am awɲ a. Krekrɛ e lel na, ow elm Nyamel nuɲ nyam oglog egɲ nuɲ nyam n'awɲɲm, kɔ ke wɛl áwl lel a Sinyamel a nɔnɔ em. Lel ab em, ów yony anake n'am dad ow ec'odad a: krekrɛ em a, n'am dad wɛl eke wɛl k'us ejagb nyim nyim a ce jam. Odad na e nyandre el ke -n'ɔny ɔmn ey Es Kɔtɔkɔ Jesu em, ke -l'erurir el ɔfr. Yony em a, n'am dad wɛl eke wɛl k'usu sos low yegm esel ayadɲu e lís (nuɲ 2.18-29, nuɲ 4.1-6).

## Jesu el sel ec'odad

**1** <sup>1</sup>Egɲ a ek'in sosiem s'am nɔn lel na a, legɲ eke wɛl ki kokm wus na yej'a, ke in n'anɲ ñ. Low yec'eke s'uw any in e lís a el: ey s'iri in ec'odad, s'ekn'n ey ec'anyamn em, s'epɛr meny es gbiy s'ekn'n, etɲ s'itɲɲ in abu. In l'el Odad eke b'ɔɲ agɲ sel. <sup>2</sup>Odad a ek'el sel a ey ɔkm, s'ekn'n etɲ s'ij in e danɲu, etɲ s'am dad ɔny sel eɲɲ ek'anɲ segɲ feɲ a ec'odad. God'etɲ n'anɲ Nyam ab, etɲ sica l'ey ɔkm s'ekn'n. <sup>3</sup>Yec'eke s'iri ke s'ekn a, s'am dad s'ok ɔny, yec'etɲ ke ɔny yeji ókar af ey ab, ke ɔny lel ey ab s'ókr af si lool s'el nyam, Es lele Jim Jesu Krist ab em. <sup>4</sup>S'am nɔn ów amua s'ɔɲ ɔny, yec'etɲ ke ey e sos em iɲɲ a él sos em iɲɲ tasi.

## Usuayl em ec'es an

<sup>5</sup>Amani e s'iri in ogɲ ke s'am dad ɔny a el: Nyam el usuayl, ncebn kaka anm in em. <sup>6</sup>Eke si bi dad s'ese s'okɛr af in ab, etɲ si b'an es ncebn em a, ke s'el ayadɲu etɲ low nenyembri nyam anm ey em. <sup>7</sup>Kɔ eke si b'an es usuayl em, ese elel eke Nyam in obi el usuayl ab af a, ke ey feɲ s'okɛr af ñ, etɲ Jim Jesu Krist e mebl a am yɔyɔg ey e sikpl feɲ es.

<sup>8</sup>Eke si bi dad s'ese: s'am kokm sikpl, ke ey ɔfr s'am eɲurir, etɲ low nenyembri nyam anm ey em. <sup>9</sup>Eke si b'egɲ ey e sikpl s'eb Nyam ec'any af

a, li b'ow l'oc l'ap ey ke li yóyog ey eci ngesi feñ es, anke l'el cèce, l'el neny nyam es. <sup>10</sup>Eke si bi dad s'ese: s'am kokm sikpl, ke s'ew Nyam yadju, etñ in ec'odad ebl a anm ey em.

**2** <sup>1</sup>Em ec'ey, m'am non ów amua e lel m'awñ ony, yec'etñ ke kí kokmn sikpl. Kó eke batñ egñ nyam kok sikpl, ke s'onny ey e dogñ es nyam, Jesu Krist, neny nyam Es, ek'anñ Es ec'any af. <sup>2</sup>In obi l'ocr in sosi li wawr egb ey sosiem, yec'etñ ke Nyam óc ey e sikpl ap ey. Etñ ow elm ey sonny ce eci, kó wus na ec'agñ feñ eci.

### Erur ec'ol

<sup>3</sup>Eke si b'elum Nyam ec'ol a, ke ow em a, s'uw any eke s'uw'r any. <sup>4</sup>Egñ eke bi dad ese: «M'uw Nyam any», etñ l'élum ow ec'ol a, ke l'el yadju etñ low nenyembri nyam anm in em. <sup>5</sup>Kó egñ eke b'elum Nyam ec'odad ebl a, egñ a l'erur Nyam iy neny. Eke s'elum'n eben a, s'uw any eke s'okr af in ab. <sup>6</sup>Egñ eke bi dad ese: «M'anñ Nyam ab», ke li kók ese elel eke Jesu kok ab af.

<sup>7</sup>Erur em ec'agñ lisijimel, ow elm ol owr mi nonm m'awñm ony, kó ol sig a ek'egñan kpokpo em etñ a;† ol sig a ek'el odad ek'irir a. <sup>8</sup>Gbeko ow anñ ese ol owr eke m'am non m'awñ ony af. Jesu em a, s'uw any eke ol a el nawre, etñ ony e low kok em yeji ow el eben. Tasi em a, ncebn am oc es anke usuayl nawre ey okm ñ. <sup>9</sup>Egñ eke bi dad ese: «M'anñ usuayl em», etñ n'am ifn lisijim a, ke n'anñ ncebn em ce. <sup>10</sup>Kó egñ eke b'erur lisijim a, n'anñ usuayl em, low kaka anm in em eke b'ow onñ l'ey wus.† <sup>11</sup>Etñ emeny ek'egñ am ifn lisijim a, n'anñ ncebn em, n'am an es ncebn em, l'uwm usu eke n'aam ab any, anke ncebn efal il any.

### Omñ es ec'elel ek'otu ek'aan es wus af aña

<sup>12</sup>Em ec'ey, m'am awñ ony ów amua e lel mi dad ony eke Nyam oc ony e sikpl ap ony Jesu Krist e nin a sosiem. <sup>13</sup>Esel,† m'am awñ ony lel na, anke uwr egñ ek'anñ god'etñ ab any. Igbafre oto, m'am awñ ony lel na, anke ony akmn agn Low ñuñ es es. <sup>14</sup>Em ec'etuey, m'am awñ ony lel na, anke uwr Es any. Esel, m'awñ ony lel na, anke uwr egñ ek'anñ god'etñ ab any. Igbafre oto, m'awñ ony lel na, anke onyn lec, Nyam ec'odad anñ ony em, etñ akmn agn Low ñuñ es es.

<sup>15</sup>K'èrurir wus na, ob ek'anñ wus af aña yeji k'èrurir. Ek'egñ b'erur wus na, ke l'erurm Es Nyam ana. <sup>16</sup>Tasi em a, low feñ ek'anñ wus af aña ese: sos megl ec'erm es eyr owi, nyamn e low e b'ekn ec'erur lele ob ony ec'es efu ab a; ów amua feñ, kaka ánm Es ogñ owm, kó wus na af ow b'anñ ow. <sup>17</sup>Ókan eke wus na b'ow ec lel in ec'ów aw enñuñ ab ab. Kó egñ ek'am kok Nyam ec'erur a b'ow anñ godo godo feñ.

† 2.7 Èkn Jan 13.34. † 2.10 b'onñ'n l'ey wus: olog b'ow ok agñ ejeci wus. † 2.13-14 esel, igbafre oto, lele etuey ab a el omñ esel akpasu akpasu ek'anñ Nyamel ab em.

### Krist ec'efnu ayadju

<sup>18</sup>Em ec'ey, sica wanci es abal el a ow ŋ. Irir eke Krist ec'ifnu nyam in am ow. Sica jam aŋa Krist ec'efnu a eny nɔɔ; na em anake s'uw any eke ow el wanci es abal el a. <sup>19</sup>Ey ec'araŋ ce -n'ann -l'ok ɔkm, gbekɔ -l'elm ey ec'agɲ. Blel -l'eel ey ec'agɲ ana, ke blel -n'ann ey ab. Kɔ low na ey yec'etɲ ke wɛl úw any ek'el fɛɲ -l'elm ey ec'agɲ.

<sup>20</sup>Ŋny ec'a, Krist ɔɲ ɔny Abɲ Lala ek'el ɔwrɔ e mun ek'ɛɲan. Na sɔsiem, ɔny amua fɛɲ uwr low nawre any. <sup>21</sup>M'am nɔn lel na m'awɲ ɔny, ow elm low nawre eke k'uwmn any eci, kɔ ek'uwr low nawre any a sɔsiem. Etɲ uwr any eke yadɲ owi kaka ánm low nawre em owm.

<sup>22</sup>Kɔ bwo el yadju ee? Yadju el ɛɲ a eke b'egbr dad ɛsɛ: «Jesu elm **Krist!**»<sup>†</sup> ɛɲ na el Krist ec'ifnu eke b'egbr ɛs lele Jim ab. <sup>23</sup>ɛɲ eke b'egbr Jim a, ɛgbr ɛs yeji; ɛɲ ek'ɛɲ Jim eb a, okr af ɛs ab.

<sup>24</sup>Ke yec'a eke irir kpɔkpɔ em etɲ a, áɲɲ ɔny erm em. Eke yec'a eke irir kpɔkpɔ em etɲ a b'ann ɔny erm em a, ɔny yeji b'ow okar af ɛs lele Jim ab. <sup>25</sup>Etɲ kin ob a eke Jim ɛwar ey a; sel ek'ɔnym uwr.

<sup>26</sup>Mi nɔn ów amua ɔny eci, agɲ ek'am ɔl eke k'irmn ɔny a sɔsiem. <sup>27</sup>Ŋny ec'a, ɔkan eke Abɲ Lala ek'el ɔwrɔ e mun eke Krist ɔɲ ɔny a, ann ɔny em. Na sɔsiem, ow ibram eke k'ɔɔl low yegm ɛs ejec'ɛs ij, aŋke Abɲ Lala am yegm ɔny ów a fɛɲ. Etɲ ów a eke n'am yegm ɔny a el nawre, yadɲ kaka anm em. Ow sɔsiem a, àɲɲ in em ɛsɛ lele eke Abɲ Lala yegm ɔny ow e low ab af.

### Nyam ec'ey

<sup>28</sup>Sica, em ec'ey, àɲɲ Krist ab yec'etɲ ke lɛɲ eke li b'ow l'ewl l'ow a, s'ɔny erm susu, ke in ec'ow em a ɛs k'ɔnym ey, si kpabm es in e lís. <sup>29</sup>Uwr any eke Jesu Krist el neny nyam ɛs. Ow sɔsiem, ɛɲ eke bi kok low nenyembri nyam a, úwr any eke l'el Nyam ec'iy.

**3** <sup>1</sup>Èkan erur ligbel eke ey ɛs Nyam elu ɔkm ey e lís, bake ɛɲ ey in ec'ey. Etɲ nawre tasi s'el. Eke wus uwm ey any, ke l'uwm ey ɛs yeji any ana. <sup>2</sup>Erur em ec'agɲ lisijimɛl, sica s'el Nyam ec'ey, etɲ lele eke si k'annɲ a, ow k'eym ɔkm; kɔ s'uw any eke lɛɲ eke Krist b'ow ewl ow a, si b'ow s'ekn'n gbeɲ, etɲ si b'ow s'ann ɛsɛ in af. <sup>3</sup>ɛɲ ek'am eku ɔmm em low akpasu na Krist em a, am **ayal** sos ɛsɛ lele eke Krist in obi ayl ab af.

<sup>4</sup>ɛɲ fɛɲ eke bi kok sikpl a ɔb ol es, sikpl e kok el ol es ɔb. <sup>5</sup>Kɔ ɔny uwr any eke Jesu Krist ow ek'ɔny sikpl oc es, etɲ in em sikpl kaka anm. <sup>6</sup>Ow sɔsiem, ɛɲ eke b'okr af in ab a, n'am kokm sikpl owi ij; ɛɲ eke bi kok sikpl a, eknm'n etɲ uwm'n any yeji.

<sup>7</sup>Em ec'ey, ke ɛɲ kaka k'ɛjum ɔny. ɛɲ eke bi kok low nenyembri nyam a, l'el neny nyam ɛs, ɛsɛ lele eke Jesu Krist in obi el neny nyam ɛs ab

<sup>†</sup> 2.22 *Jesu elm Krist*: ow ec'iri el Jesu elm Mesi, Eb ɛs eke Nyam erm ow.

af. <sup>8</sup>Ègɛ eke bi kok sikpl a, l'el agn eci, anke god'etɛ agn el sikpl es. Na sosisem anake Nyam ec'Iy ow yec'etɛ ke ni nɔ́nɔ́n agn e juma a.

<sup>9</sup>Ègɛ ek'anɔ́ Nyam ab a, n'am kokm sikpl owi, anke Nyam ec'odad a anɔ́ in em ese egb eke wel ewl af. L'ɔ́tum eke li ki kok sikpl owi ij anke l'el Nyam ec'iy. <sup>10</sup>Kin low yec'em eke wel b'uw Nyam ec'ey lele agn ec'ey ab any a: egɛ ek'am kokm low nenyembri nyam, ke emeny érum lisijim yeji a, l'elm Nyam ec'iy.

### ɔ́nyn erur ese Jesu af

<sup>11</sup>Tasi em a, kin yec'eke wel dad ɔ́ny irir kpɔkpɔ em etɛ a: ke s'érum ey ɔ́fr. <sup>12</sup>Si k'ót Kayen ek'agn Low nɔ́nɔ́n es ɔ́nɔ́n ibi lisijim ab es. Etɛ kɔ́ bla sosisem l'ibi ow ee? Eke in ec'ów e li bi kok a ákplm ke lisijim ec'a b'akpl a sosisem.

<sup>13</sup>Agɛ lisijimel, ow k'íti ɔ́ny any eke wus b'ifn ɔ́ny. <sup>14</sup>Ey s'uw any eke s'ubr luw em s'ey owr anɔ́ em, anke si b'erur ey lisijimel. Ègɛ ek'onym erur a, n'anɔ́ luw em. <sup>15</sup>Ègɛ eke b'ifn lisijim a, l'el egɛ ibiu, etɛ uwr any eke egɛ ibiu, sel ek'onym uwr a anm in em.

<sup>16</sup>Kin lele eke s'uw erur any: Jesu Krist oc in e sel a ɔ́nɔ́n ey; ow it eke ey yeji si k'oc ey e sel s'ɔ́nɔ́n ey lisijimel. <sup>17</sup>Ek'egɛ nyam ɔ́ny ob, etɛ l'ekn lisijim ek'anɔ́ es abur em, etɛ l'ikɔ́m ow sɔ́nɔ́n a, ke ayaf Nyam ec'erur a anɔ́ in em ab ee? <sup>18</sup>Em ec'ey, eke si b'erur ey ɔ́fr a, ke s'ɔ́tu eke si k'elumnin abu, ke ow k'élm anm af e dad em ɔ́ny.

<sup>19</sup>Eke si b'erur ey ɔ́fr, si b'ow s'uw any eke s'anɔ́ Nyam ek'el low nawre es ab, etɛ si b'ow s'ɔ́ny erm es ey in ec'any af. <sup>20</sup>Ek'ey ec'erm a b'ɔ́b ey low, ke Nyam agb akm ey ec'erm a, etɛ in l'uw low feɛ any.

<sup>21</sup>Erur em ec'agɛ lisijimel, eke sica ey ec'erm a ɔ́bm ey low ij a, ke s'ɔ́ny erm es ey Nyam ec'any af. <sup>22</sup>Ob kaka feɛ eke si b'ibrm'n a, li b'ow n'ɔ́nɔ́n ey, anke si b'ɔ́su in e sol a, etɛ si bi kok yeci ek'akpl'l sos em a.

<sup>23</sup>Etɛ kin in ec'ol eke n'am ɔ́nɔ́n ey: s'úb Jim Jesu Krist nawre, ke s'érum ey ɔ́fr. <sup>24</sup>Ègɛ eke b'ɔ́su Nyam e sol a, okr af in ab etɛ Nyam yeji anɔ́ in ab. Etɛ in ec'Abɛ eke n'ɔ́nɔ́n ey ab em, s'uw any eke n'anɔ́ ey ab.

### Nyam ec'Abɛ lele Nyam ec'ifnu ec'abɛ ab

**4** <sup>1</sup>Erur em ec'agɛ lisijimel, ek'egɛ b'ow egɛ ɔ́ny etɛ bi dad eke abɛ ec'abusu em in bi kok ów yeji, k'ubr ir nawre kpɛkɛ. Kɔ́ òkr any es ekan eke nawre em el ec'abɛ a el Nyam ec'Abɛ, anke **kokoba** ɔ́b esel ayadɔ́n ɔ́nɔ́n gbɛl ok ɔ́km wus af aɔ́a. <sup>2</sup>Kin lele eke k'ubar Nyam ec'Abɛ ab any: ek'egɛ bi dad ese: «Jesu Krist el egɛ ow wus af aɔ́a», ke egɛ na ɔ́ny Nyam ec'Abɛ. <sup>3</sup>Kɔ́ egɛ ek'égɛm ebm eke Jesu Krist el egɛ eke wel ew sos megl em a, elm Nyam eci. L'el Krist ec'ifnu a eke irir in eci mowrer e low a. Sica gbɛ l'ow wus af aɔ́a ñ.

<sup>4</sup>ɔ́ny, em ec'ey, eel Nyam eci, etɛ akmn kokoba ɔ́b esel ayadɔ́n ab es, anke Abɛ a ek'anɔ́ ɔ́ny em a ɔ́ny lɛc akm wus ec'agɛ ec'a. <sup>5</sup>Èl, -l'el wus

na eci, na sosiem -li bi dad wus na ec'ow eke wel bi kok ec'odad, etj wus ec'agj b'iri el e low, egj eb. <sup>6</sup>Ey, s'el Nyam ec'agj. Egj ek'uw Nyam any a, b'iri ey e low. Egj ek'uwm Nyam any a írim ey e low. Na em si b'uw low nawre ec'Abj lele yadj ec'abj ab any.

### S'ony erur anke Nyam ikj anym erur ey

<sup>7</sup>Erur em ec'agj lisijimel, s'erurir ey çfr, anke Nyam ogj erur b'anj ow; etj egj fej eke b'ony erur a, el Nyam ec'iy etj l'uw Nyam any. <sup>8</sup>Egj ek'erurm a uwm Nyam any, anke Nyam el erur. <sup>9</sup>Kin elel eke Nyam ec'erur a ey çkm ey e lís: l'erm in ec'Iy ekpöbi a ow wus af aña, yec'etj ke s'éjn sel in em. <sup>10</sup>Etj erur a el: ow elm ey eke s'erur Nyam a eci, kç Nyam in obi l'erur ey etj l'erm in ec'Iy a ow, ocr in sosi kokr egb waw uw ey e sikpl ec'oc ap sosiem.

<sup>11</sup>Erur em ec'agj lisijimel, eke Nyam erur ey eben a, ey yeji ow it ke s'erurir ey çfr. <sup>12</sup>Egj kaka eknm Nyam; gbekç eke si b'erurir ey çfr a, Nyam anj ey ab, etj in ec'erur a b'ey çkm tasi ey em.

<sup>13</sup>Kin elel eke s'uw any eke s'anj in ab, etj in yeji n'anj ey ab: n'oj ey in ec'Abj a. <sup>14</sup>Etj ey s'ekn etj s'am dad eke nawre, Es erm Jim ow el wus na ec'agj ec'Eb Es. <sup>15</sup>Egj eke b'egj eb eke Jesu el Nyam ec'Iy a, Nyam anj in ab etj in yeji n'anj Nyam ab.

<sup>16</sup>Etj ey s'uw erur eke Nyam çny ey ec'ab any, etj s'ub erur a e low nawre; Nyam el erur. Egj ek'ony erur a anj Nyam ab, etj in yeji Nyam anj in ab. <sup>17</sup>Eke erur iy neny igj nuj ey em a, si b'ow s'ony erm susu legj a eke si b'ow s'im Nyam ec'any af jej ok em a. S'otu eke si k'ony erm susu ikj na, anke wus af aña, ey eci eb ir a otarir es Jesu Krist ec'ab ab. <sup>18</sup>Ek'egj b'ony erur a, l'urum erjn ij. Erur tasi a b'ogj erjn. Ek'am tutr eke wel b'ow çb'j low jej ok em a, ke ám uru erjn. Etj egj eke b'uru erjn a, çnym erur tasi.

<sup>19</sup>Kç ey s'ony erur anke Nyam ikj anym erur ey. <sup>20</sup>Ek'egj bi dad ese: «m'erur Nyam» etj n'am ifn lisijim a, ke l'el yadj; tasi em a, egj ek'erurm lisijim eke n'am ekn a, ayaf li b'ow l'otu l'erur Nyam eke l'éknm ab ee? <sup>21</sup>Etj kin ol eke Nyam çj ey: egj eke b'erur Nyam a, ke l'éur lisijim yeji.

### Elel eke si k'akmn wus es

**5** <sup>1</sup>Egj fej ek'ub nawre eke Jesu el Krist a, el Nyam ec'iy. Etj egj fej ek'am erur Es Nyam a, am erur in ec'ey a yeji. <sup>2</sup>Eke s'am erur Nyam etj s'am çsu in e sol a, ke s'uw any eke s'am erur Nyam ec'ey a yeji. <sup>3</sup>Nyam ec'erur a anj in e sol a ec'çsu em. Etj in e sol a çtum, <sup>4</sup>anj egj fej ek'el Nyam ec'iy a akm wus es; etj ey ec'çmn e s'ony Nyam em a anake b'akm wus es a.

### Ów yec'em eke wél k'ub nawre eke Jesu el Nyam ec'Iy

<sup>5</sup>Bwo ec'egj akm wus es, ek'ow elm egj a ek'ub nawre eke Jesu el Nyam ec'Iy ab ee? <sup>6</sup>Jesu Krist in obi ow wus af aña, wel ok'r mij nuj,

etj l'uw l'ok mebl es; l'ecr mij ok nuŋ em, l'uw l'ok mebl es eŋe eŋj af; ów yony na em, Abj Lala ij danjku eke ów amua el nawre, aŋke Abj Lala ónym yadŋ. <sup>7</sup>Ów nyahan anj eke okr af am ij danjku nyam: <sup>8</sup>Abj Lala, mij lele mebl ab.

<sup>9</sup>Si b'egj agj e danjku ij a s'eb, kɔ Nyam e danjku ij a agb akm agj ec'a, aŋke Nyam in obi ij danjku Jim e nuŋ af. <sup>10</sup>Egŋ ek'ub Nyam Jim nawre a, danjku ij na anj in em; egj ek'ubm nawre a b'ɔb Nyam yadŋ, aŋke l'ubm Nyam e danjku ek'ij Jim e nuŋ af a nawre. <sup>11</sup>Etj danjku ij a el: Nyam ɔŋ ey sel ek'onym nuŋ, etj sel a anj Jim em.

<sup>12</sup>Egŋ ek'eb Jim a eŋn sel; egj ek'ebm Jim a eŋnm sel.

<sup>13</sup>M'am nɔn ów amua m'ɔŋ ɔny, yec'etj ke úwr any eke, ek'am ubr Nyam ec'Iy a nawre a, ke eŋan sel ek'onym nuŋ.

### Nyam ŋɔŋ e lec

<sup>14</sup>Eke si b'im in ogj, ke s'ony lokm susu, aŋke low feŋ eke si b'ow s'ibrm in ec'erur em a, li b'ow l'iri ey lebl. <sup>15</sup>Etj eke s'uw any eke li b'iri ey lebl a, ke ob feŋ eke si b'ow s'ibrm'n a, s'úw any eke s'eŋn ŋ.

<sup>16</sup>Ek'egj nyam am ekn lisijim ek'am kok sikpl ek'elm luw ec'a, ni ŋɔŋ Nyam, ke Nyam óŋ lisijim na sel. Na ow el agj eke bi kok sikpl ek'elm luw ec'a e lís e low. Gbekɔ sikpl nyam anj ek'el luw eci; ow elm sikpl ikŋ na eci Nyam m'esme ŋɔŋan. <sup>17</sup>Low ŋuŋ feŋ eke wel bi kok Nyam e lís a el sikpl. Gbekɔ ow elm sikpl feŋ ísam egj luw ab.

<sup>18</sup>S'uw any eke egj feŋ ek'el Nyam ec'iy a, am kokm sikpl, aŋke Nyam Jim Jesu Krist b'ɔsu'r, etj agn éŋnm'n. <sup>19</sup>S'uw any eke s'el Nyam ec'ey, kɔ wus af aŋa ec'agj ejeci ek'elm Nyam ec'ey a anj agn ec'es ew em.

<sup>20</sup>Emeny s'uw any eke Nyam ec'Iy ow wus af aŋa etj n'ɔŋ ey nuŋ em ɔny eke si k'uw Nyam nawre any. S'okr af Nyam nawre ab, Jim Jesu Krist em. Jim na anake el Nyam nawre a, in l'el sel ek'onym nuŋ.

<sup>21</sup>Em ec'ey, ɔsur sos ke k'úsmn yec'eke elm Nyam a jam.